

Mr. Speaker, Hon Roger Mancienne
Mr. Deputy Speaker
Lider Zafer Gouvernman dan Lasanble nasyonnal
Lider Lopoziyon
Tou MNAs
First Lady Linda, VP Afif, PM Ferrari, Minis
CJ Govinden
Prezidan Lakour Dapel Mr. Fernando
Manm Kor Diplomatik
Tou envite distenge e ser Pep Seselwa

Mr. Speaker,

Premyerman les mwan felisit sa 3 nouvo manm Lasanble Nasyonnal ki ganny sermante ozordi. Mon swet zot bonn sans dan zot travay. Mon profite pou anonse ki Hon Zialor ek Hon Larue pou osi pran serten nouvo responsabilite lo nivo nasyonnal e la mon dir zot mersi pour zot kontribisyon pandan bann lannen ki zot in servi dan Lasanble. Hon Zialor, nou ava mazin ti premye MNA avek en dezabilite permanan e in azir koman en anbasader pour tou sitwayen avek dezabilite e mon pou donn li nouvo responsabilite dan sa domenn. Hon Larue i annan en kantite abilite e li osi i pou annan responsabilite kot i ava kapab ede met son abilite anpratik. Bonn sans toulede e mersi bokou lo laper nou tou.

Mon osi anv i o-komansman remersye Mr. Naadir Hassan kin responsab Minister Finans dan bann moman pli difisil listwar nou pei. Atraver son konsesans ek langazman in fer Sesel pas atraver Covid, konfli Larisi/Ukraine, konfli Izrael Hamas ek konsekans Lanmer Rouz, e ozordi nou pei i dan bon direksyon gras a son kontribisyon. I kontinyen deservi koman tyermenn Bord IDC. Mon pou touzour rekonesan personelman pour son gidans e ansanm avek son bann koleg minis ek lepep Seselwa, mon dir li mersi bokou pour tou ki in fer pour son pei.

An-akor avek Lartik 65 Konstitisyon Sesel, I en loner pour mwan vin devan Lasanble Nasyonnal pou delivre mon ladres lo Leta Lanasyon. Lo plizyer lokazyon monn fer li mon devwar pou vin koz avek lepep Seselwa lo realite nou pei, pou koz lo bann size ki reflekte lo defi, loportinite e vizyon pour en meyer ozordi e ki donn lespwar pour demen. Ozordi, mon pou ankor enn fwa koz fran avek nou pep akoz mon krwar ki sel fason pour nou fer fas avek

larealite se pou konfront laverite direktman e onnetman. Letan nou byen analize, nou kapab osi pran bon desizyon pour nou transform lafebles dan lafors e defi dan loportinite. Avek en pep Seselwa ki pe kontinyen mars ver matirite, mon napa okenn dout ki lannen 2025 pou montre ankor enn fwa ki atraver nou lespri Kreol, nou annan en pep entelizan ki pli gro lanmer pa zanmen fer li per.

Sesel ozordi I diferan avek Sesel 2020 dan en kantite fason. Pandan sa dernyen 4an noun fer tou zefor pou kontinyen travay san ses dan transformasyon nou pei atraver donn nou pep pli gran swa, en meyer lavi, plis loportinite e pli gran laliberte. Noun met lanfaz pou regarde ki mannyer nou pou kontinyen ranforsi nou demokrasi atraver fer bann lenstitisyon vin pli solid e pli efektiv. Noun sorti dan en sitiasyon kot dimoun ti annan lafreyer pour ekzers zot laliberte lekspresyon kot enn ki dimoun I annan tou laliberte pou eksprim li, lo pwen kot sa menm laliberte I ganny abize non pa par restriksyon, me par mank respe pour laliberte lezot dimoun. Nou parfwa oubliy prensip ki dir ki mon drwa i fini kot sa ki pour ou i komanse. Alor deswit mon pou ensiste ki nou reste en pep ki montre respe e rekonnèt drwa lezot, parey nou tya kontan nou osi ganny menm respe.

Pandan sa bann lannen depi Oktob 2020, noun osi war en nouvo lespri gouvènanans kot lobligasyon I ganny mete lo responsabilite ek respe pour sak endividi, kot napa viktimizasyon e kot sak dimoun, spesyalman bann ki travay dan gouvènanans, in kontinyelman ganny demande pou met sa lespri servis pour sa pep koman zot priorite. Sa I fer ki lanfaz in ganny mete lo ki mannyer nou donn nouvo valer nou Seselwa atraver son lanvi pou travay dir e ki lenportans I atase avek tou sa ki arive otour li dan son kominote. Zenn, koman bann ki pli aze, in ganny envite pou partisip a-plen dan sa mouvman nasyonnal afen ki tou endividi, fanmiy ek bann manm dan nou sosyete I kapab epanouir e pli benefisye lo kwa ki pei I kapab ofer. Se prensip meritokrasi ki rennyen ozordi e non pa faver ek nepotism.

Mr. Speaker, I kler ki sa I enn bann defi pli gran pour nou pep fer fas avek aköz I demann en sanzman lespri, oubyen parey nou dir an angle ‘change of mindset’ parmi bann ki okip pozisyon kle kot I annan enteraksyon avek nou pep. Aköz mon dir sa? Pou sorti dan en sitiasyon kot pouvwat pran desizyon e fasilite lavi ek demars ti dan lanmen gouvènanans santral, oubyen Prezidan anba ansyen sistenm, kot idantite ou fanmiy oubyen afiliasyon politik ek lezot ti bann faktor determinan dan okenn demars ki en sitwayen ti fer, pou fer li vin lo nivo departman an regardan senpleman merit en ka I reste en gro latas pour serten. E se

la kot nou popilasyon I pri e fristrasyon I dire. I fasil pour bokou dimoun dir pous dimoun dan zot lanplwa. Me mwan mon enn kin war bokou progres e sanzman fason fer, e mon senserman krwar ki a-mezir ki nou bouze, nou pou konstri en lafors travayer ki matir, konsansye e travayant. Alor, mon anvi ankouraz tou dimoun pour nou kontinyen mars ver sa direksyon pozitiv pour ki nou pei I fer progres pour benefis nou pep.

Mr. Speaker, mon fer li mon devwar pou vizite e koz avek travayer gouvènmàn ki delivre servis avek piblik. Mon ekoute, diskite e regarde ki manyer nou kapab fer keksoz bouze afen ki piblik i resevwar en servis akseptab e apwopriye. Sa lannen pann en leksepsyon e deza monn ganny loportinite pou vizit biro Rezistrar Zeneral ek bann biro gouvènmàn lo Praslin. Monn rankontre travayer lo Praslin par egzanmp ki ti refize retir portre Prezidan Faure lo miray apre eleksyon, bann kin penaliz dimoun ki bezwen sipor sosyal e demann zot si zot pa ti tik anler, bann ki ti dir mwan dan mon figir menm si mon prezidan mon pa pou kapab koz ek son sef. Tou sa bann dimoun i ankore pe travay e mon senpleman demande ki latitud i sanze e zot kit zot politik kot zot, dan lakour. Monn ekout bann defi e ansanm noun rod solisyon. Mon espere ki aprezan avek bann nouvo formil, par egzamp kot tou lazans konsènen lo Praslin/La Digue, kot donn en lisens i konsènen pou zwenn tou le dezyenm lendi, tou kliyan i ava ganny en servis efikas e vit. Mon senpleman demande ki lepep Seselwa i ganny servis ki i merite.

I annan en pwen kardinal dan tou sala ki fodre nou sezi. Letan nou koz lo fasilite resevwar en servis apwopriye, i annan en relasyon direk avek kou lavi ek lekonomi nou pei. Pli keksoz i tarde, pli i kout pli ser pou sa endividi fer son demars e sa biznes i perdi reveni e nou zenn pa ganny lanplwa. Sa endividi ki resevwar son kare later a-tan pou konstri son lakaz i fer en lekonomi lo pri konstriksyon limenm. Par egzanmp, sa dimoun kin resevwar en kare later apre atann en kantite letan poun war pri konstriksyon sorti R8000 par met kare pou ariv R12,000, en logmantasyon R4000 ki vèdir son lakaz pou kout li bokou pli ser, son laz poun monte, ki kapab vin en lobstak pour son loan e tou sa i annan en lenpakt lo li ek son fanmiy. Trenn lipye i annan konsekans grav e ekonomik, alor tou travayer i bezwen vin konsansye e pran desizyon ki bon e ki pou akonpanyan en kliyan.

Letan en biznes i resevwar fasilite en servis efikas e vit, deswit i debourye, dimoun i ganny lanplwa ek en servis adisyonnèl, i komans pey taks apwopriye e larzan ki rantre dan kof gouvènmàn i permet travayer resevwar en pli bon lapey, lepep I ganny bann pli bon servis tel

ki dan lasante, ledikasyon, sosyal ek tou bann lezot ki nou konnen e ekspekte. Alor ozordi, ankor enn fwa mon lans sa menm lapel ki'n vin en litani aniel isi dan Lasanble avek tou dimoun ki travay dan okenn biro gouvènmman pou pran zot responsabilite o-serye. Monn fer piblik nimeron telefòn ek e-mail adress tou bann o-zofisye aparti PS ziska direkter pou ki dimoun i kapab kol zot oubyen kominik avek zot pou en sel rezon : Donn lepep Seselwa sa servis ki i merite e ki pou fasilite son lavi e retir fristrasyon lo sa dimoun ki pe rod en senp servis san ki i bezwen kol mwan. Tou dimoun ki resevwar en lapey sorti dan kof gouvènmman i bezwen montre ki i vo sa larzan ki i gannyen. Parey ki nou esper lafendimwan, annan met menm zefor pou donn sa dimoun ki pe esper sa servis satisfaksyon.

Malgre tou sa zefor ki gouvènmman in mete pandan sa dernyen 4an pou esey kas bann lanpayaz e ankouraz lefikasite e latransparans dan bann prosedir, nou vwar nou pe fer fas avek menm batay ziska ozordi. Nou'n esey nou mye pandan sa 4an pou fasilite e senplifye bann prosedir. Nou'n edike, noun eksplike, e nou'n partaz sa vizyon ki gouvènmman in annan pou devlopman biznes. Sa kin anvitan tandè in tandè, me sa ki ankor pe tat tate, in kontinyen avek sa vye mantalite kot kontrol e menm malis I persiste.

Dezormen, sa bann pouvwar ki serten i santi i kapab kontinyen egzerse pou met retar e kree fristrasyon pou ganny kase. Apre konsiltasyon avek konsey Minis, Lotorite Laysens pe al antreprann en transformasyon kot pou nepli annan bann gran gran prosedir pou ganny en laysens. I pou vin pli senp posib: Ou enterese pou fer biznes alor I pou on responsabilite pou fer fas avek tou lobligasyon, enkli fer fas ek tou konsekans ler ou kas kondisyon. Tou sa bann baryer ekzazere ki nou pe war ozordi pou ganny laprouvasyon avan ganny sa laysens, pou resorti konpletman.

Mon fatigue avek bann desizyon bet e pa fer sans ki ariv devan mwan koman prezidan, e se mwan ki bezwen deblok bokou sa bann sitiasyon. Tou dimoun ki ganny peye I bezwen fer zot travay an-ord. Mon pe osi demann bann minis pou pran aksyon neseser dan zot minister an-relasyon avek bann lazans, ki souvan olye ede pou fasilite biznes zot blok biznes. Mon pe demann tou minis pou asiz avek bann lazans konsènen dan zot minister tou le semenn pou fer sir ki file pe bouze e desizyon apropriye pe ganny pran imedyatman e ganny kominike avek kliyan pou fasilite zot demars e larg lanmen Seselwa. Mon osi ozordi demann bann dimoun dan lofis ki krwar zot rol se pou blok biznes, fer lavi lezot pli difisil posib e pa war lenportans fasilite biznes, kree lanplwa ek laris dan nou pei, ki sa letan in fini.

Mr. Speaker, Sesel ozordi I ganny rekonnèt koman sa pei Lafrik kot lademokrasi I en realite e kot son pep I kapab epanouir an tout liberte. Pou sorti premye lo Mo Ibrahim Index lo bonn gouvernance ek demokrasi I pa en keksoz ki vin san gran zefor ek determinasyon. La mon kapab dir avek lepep Seselwa ki sa ti en target ki mon ti met devan konsey Minis kot mon ti fer kler ki nou kapab fer sa arive. Sak minister ti fer son zefor ansanm avek tou lenstitisyon nasyonnal e ozordi nou fyer nou lakonplisman koman en pei. Letan serten pe konplent lo tou keksoz, lemonn pe rekonnèt nou lakonplisman plis ki zanmen. Nou bezwen note ki i fer premye fwa ki Sesel I sorti premye lo sa lendeks.

Me nou pa aret zis la. I annan bokou sa bann lezot lendeks ki devret fer nou fyer koman en nasyon. Parmi se pei mwen koronpi Lafrik e lo nivo mondyal nou tonm par devan Lanmerik ek bokou lezot pei Eropen lo pozisyon 18 parmi 180 pei, pei Lafrik avek meyer lekonomi, pei avek paspor pli for e modern dan Lafrik, pei avek pli o GDP dan Lafrik, pei ki pli akeyan e fasil pou vizite ek bokou lezot. Alor letan nou pe kontinyen travay dir pou fer monte nou paviyon, mon kontinyen envit tou Seselwa pou osi met tou lenerzi pour nou fer avanse nou demokrasi, laliberte endividyel, latransparans ek proteksyon tou drwa ek laliberte endividyel.

Mon kontan pou dir ki en rapor pli etrwat pe ganny etabli ant gouvernman santral avek bann lenstitisyon dan nou pei. Atraver sa mon espere ki febles dan servis gouvernman i ava ganny adrese parey monn mansyonnen pli boner. La ankor enn fwa mon lans en lapel avek tou lazans dan nou pei pou elimin sa eleman ‘silo’ e devlop en lespri travay ansanm pou devlop plis efikasite. Lenformasyon fodre ganny partaze e kot en lazans i kapab asiste en lot, silvouple annan fer li. Servi nou lekor koman en legzamp – si letan nou nennen ti santi en loder brile, i pa ti alert nou lespri ek nou lekor pou bouz lo aksyon, rezilta ti pou en katastrof terib. Nou osi fer parey e nou ava war ki mannyer nou transform lavi nou pep e nou ava viv dan en pei ki fer nou fyer.

Mr. Speaker, dan sa menm lalinny, mon oule met lanfaz ki Sesel ozordi I en pei kot se lalwa ki par lao nou tou. Napa personn ki parlao lalwa akoz lalwa I aplik pour tou dimoun dan menm fason. Ou larelizyon, appartenans politik, kouler ou lapo, klas sosyal oubyen nivo ledikasyon I enferyer devan lalwa. Fodre ki nou mentenir sa prensip akoz se sa ki pou permet nou koman en pei kontinyen promot prensip egalite ek lazistis pour tou. Sa ki aplik pour enn I bezwen aplik pour lot. Letan faver ek nepotism i ganny ranplase avek prensip ladrwatir ek

meritokrasi, tou dimoun pou santi en pli gran valer ek lafyerte lezitim. E se dan sa direksyon ki dan sa lannen 2025 Seselwa I anvii kontinyen marse. Seselwa I vreman pour tou son zanfani, me move zanfani fodre sanz zot move mantalite.

I enportan pou note ki se bann tel prensip ki pou ede mentenir stabilite ek lape dan nou pei. Se sa ki pou permet Seselwa prezerv tou drwa ekonomik nou pep, asire ki akse avek tou servis I reste disponib pour tou zanfani Seselwa, e parlo tou, garanti ki nenport zanfani, dan nenport ki sirkonstans lavi pou reisir isi dan Seselwa, sa bizou ki vin sa vre later loportinite pour tou son zanfani. Sa ki andeor lalwa dan drog, kriminalite ek koripsyon, bann fleo ki fer nou perdi direksyon, pou ganny konbat a tou pri avek tou zefor ek mwayen apropiye. Nou bezwen donn nou pep sa ki meyer e fodre ki sa lespri lazistis I renye a tou moman. Annou pa zanmen rekile kot noun arive e parey Seselwa pe dir ozordi 'No Turning Back!'

Mr Speaker, dan sa konteks lalwa, mon bezwen raporte ki dan sa dernyen 4an I moman kot noun anmenn pli gran lalit kont drog e malgre lantetman serten pou kontinyen dan sa biznes, mon anvii ankor enn fwa dir avek lepep Seselwa ki nou pou ariv kot sakenn sa bann dimoun ki antete. Noun aret lerwa, larenn, prens, prenses ek zot bann akonplis. Ozordi Mahé, Praslin ek La Digue pe respir pli byen. Mon ti donn warning, me zot pa ti ekoute. Ozordi mon anvii dir avek nou pep ki byento pou annan ankor ki pou ganny arete. Alor mon konsej pour zot se arete fer rantre dan nou pei sa pwazon ki detri nou popilasyon, ki transform bann zoli fiy dan en lonbraz zot bote, bann zenn onm for dan bann robot e ki les zanfani ek fanmiy dan soufrans total letan zot pe zet sa dernyen ponnyen later lo zot serkey dan simityer. Aret briz lavenir nou lazenes. Aret detri nou pei. Aret kas rev sa paran. Geri leker sa manman ek sa papa, sa frer ek sa ser, sa zanfani, ki pe pler disan akoz en manm zot fanmiy. Silvouple annou fer sa arive.

Ozordi nou annan bann pli gran trafiker ki dan prizon apre ki zot in ganny trouve koupab. Malerezman menm dan prizon serten I kontinyen e parey zot in kapab swiv I annan omwen 3 kondannen ki pe fer fas avek nouvo sarz enportasyon. E pandan ki mon pe koze mon kapab dir zot pa etonen si I annan ankor ki ganny atrape e sarze. Bokou pe osi ganny sarze pou trafik imen, e plis ankor pou ganny aret byento, kot san pitye zot in pran zot frer Seselwa pou anvoy koman garanti pour zot pwazon an Iran. Serten Seselwa in ganny touye Iran e se Seselwa menm kin bezwen anter zot. Nou pou anmenn tou ki responsab devan lazistis. Sa kalite tortir ki zot in pas ladan I senpleman terib. Mon determinen pou fer retournen otan nou

bann Seselwa e pran aksyon legal kont bann ki responsab pour zot soufrans. Sa i mon langazman anver sa bann frer ki ankor an kaptivite e pour zot fanmiy. Bann ki responsab, met zot pare akoz nou pou ariv devan zot laport san pitye.

Noun detri tonn drog lo lanmer avek led nou bann partener. Noun entersepte plizyer kargezon e aret dimoun. Noun retir otan drog ek larzan sal an sirkilasyon. Bann byen malaki pe ganny sezi enpe partou. Ozordi nou bann kominote pe respir bokou pli byen, me I ankor annan travay pou fer. Sa bann politisyen ki debout lo kote drog e ki pe konplent ki en lalinny R25 in ariv R300, oubyen bann ki pe defann trafik drog letan lotorite I fer bann raid pa pe ed nou pei ek nou bann zenn. Mon envit zot pou zwenn nou dan sa lalit pou elimin drog dan nou pei, olye promet trafiker ki zot biznes pou refleri e promet droger ki zot pou ganny zot deal normal san harassment si zot vote pou tir Ramkalawan State House. Bann manman, papa, zanfan, ek zanmi sa bann viktim, ansanm avek kominote I kondann zot latitid. Langazman sa ladministrasyon I reste pou lalit kont drog ziska nou elimin li.

Mr Speaker, ozordi nou pei Sesel pe kapab ankor enn fwa partaz larises ki I kree avek son pep. Parey Gouvernman in anonse, sa lannen 2025, tou travayer pou ganny en logmantasyon lapey. Sa I aplik pour bann ki dan gouvernman e bann ki dan sekter prive. Tou nou granmoun pou ganny en benefis azoute lo zot sekirite sosyal, bann etidyan adilt(mature students) dan bann lenstitisyon pos segonder osi pe ganny trete diferaman, bann benefis sosyal in amelyore pou asir en lavi dan pli gran konfor, pour premye fwa carers osi ansanm ek pansyonner i kalifye pour en loan avek HFC e tou nou zanfan lekol pou kontinyen ganny asiste avek goute dan bomaten e dezennen pour bann ki tya voudre. Se sa ki fer mwan dir avek lafyerte ki sa lakonplisman I fer ki napa okenn zanfan lekol ki asiz dan laklas avek en lestoman vid. Se sa leta nou pei ozordi e Seselwa I devret fyer.

Mr Speaker, mon ladministrasyon pou kontinyen pran swen avek nou pep. Malgre ki serten i kapab dir pa ase, e ki mon konpran zot, mon anvi envit tou Seselwa pou realize kote nou sorti depi 2020 e pour zot realize ki sak sou ki sa pei in prodwi in retourn kot son pep. Se sa ki fer nou ganny rekonnent dan sa premye 20 pei dan lemonn ki mwen koronpi. E si fodre met palto pou pli byen 'represent' e rod plis benefis pour nou pei, nou pou fer li akoz met kitenge pa pou anmenn nou okenn par !

Me la ankor enn fwa, letan gouvènmman pe fer son bout, i enportan pou sekter prive osi zwe son rol. Pri lavi i pa zis gouvènmman ki kontrole, me nou tou ansanm. Letan bann enportater manze i met bann profi ekzorbitan lo zot prodwi, se nou pep ki soufer. Letan dimoun pa fer son travay byen e prodwi i reste lo por pli lontan e bezwen pey sirsar, se konsomater ki pey lekonskans. Si sak fwa gouvènmman i donn en logmantasyon lapey, deswit marsandiz i ogmante dan laboutik e si boutikye i kontinyen servi calculator pou vol kliyan, byensir pri lavi pou kontinyen ogmante e apre gouvènmman pou ganny akize. Si pour en senp pti servis, kliyan pe ganny trangle, byensir pri lavi pou ogmante, e si nou pa konn nou priyorite e krwar ki demen pa egziste e depans tou ozordi, byensir nou pou war pri lavi koman nou pli gro lennmi e olye regarde ki rol ki nou annan ladan, nou pou senpleman blanm lezot.

Mr. Speaker, mon anvì lans sa lapel swivan : Premyèrman, mon demann popilasyon pou pran son responsabilite e depans son larzan byen. Pran lenformasyon lo kote ki komisyon i mwen ser, regarde si ou pa pe ganny vole dan laboutik, konn ou drwa e rod sa ki esansyel e depans byen ou larzan. Pour tou boutikye, mon enplor zot pou pa abiz lo bann kliyan. Pa ogmant pri komisyon zis pour zot ganny plis profi, me tret nou dimoun byen. Pour bann ki ofer servis, donn bann pri rezonnab e akseptab. Avek en tel kolaborasyon, nou pep i ava ganny en meyer lavi e latmosfer biznes i ava osi bokou pli prodiktiv e ankourazan. Eski i pou tro bokou pour mwan demann tou bann ki fer ‘wholesale’ e bann boutikye pou fer en bon lekzanminasyon konsyans e pou regarde ki mannyer zot kapab fer desann pri marsandiz ki zot pe vann. Mon lans sa lapel la ki Kretyen pe rantre dan Karenm, Mizilman pe rantre dan Ramadan ek bann Hindu fek selebre Thaipusam. Parey nou lafwa i dir nou pran konsiderasyon pour lezot, annou met sa ki byen an-aplikasyon pou kontan tou dimoun e non pa pou kontan zis nou pos.

Mr. Speaker, letan nou reflesi lo nou pei ek son lavenir, e nou met nou lekspektasyon vreman o, annou pa zanmen oubliye ki tou sala, konmdir granmoun ‘pann ariv par laverti nou tabatyer.’ Annou pa oubliy Kovid 19 ki ti met nou lo nou zenou san pitye, ki ti fer kof leta vid, e ki se atraver bon travay e planifikasyon nou ladministrasyon ki nou ti kapab vaksin nou pep, reouver erport, antreprann bann proze kapital tel ki konstri lakaz, refer batiman ki kin ganny abandonnen tel ki Libreri Nasyonnal, NIHSS ek Batiman Carnegie, donn bann distrikt nouvo fasilite lapas, nouvo terminal pou pasaze, konstri lopital ek klinik, por, fasilite pour militer ek lapolis, e rekonstri nou lekonomi dan en fason serye. Malerezman noun sitan byen travay e soulaz nou pep ki bokou in fini oubliye telamn zot dan bon.

Ozordi, senpleman atraver nou zefor kolektif nou rezerv o-komansman Fevriye 2025 I \$789m konpare avek \$559m an Desanm 2020 letan nou ti rantré dan ladministrasyon. Sa i pli o ki in deza ete. An dot mo, noun fer grandi nou rezerv par anviron 45%, oubyen par plis ki \$200m malgre tou. An term rezerv enternasyonal net, i ti ariv US\$641 milyon e depas target US\$622 milyon pour premye kar 2025 par US\$19 milyon.

Alafen 2020, stok det Pei ti total SCR 19.5 Bilyon, ekivalan 80.2% nou Prodwi Domestik Brit. Alafen 2024, sif preliminar I montre en stok det SCR 18.8 bilyon, ekivalan 60.7% nou Prodwi Domestik Brit.

Sa in arive akòz sa ladministrasyon i serye e i annan en bon polisi fiskal e moneter. I osi bon note ki sa ladministrasyon pann zanmen rat en sel peyman son det. Bonn nouvel osi se ki letan nou ti rantré pou diriz pei, nou ti lo ‘black list’ Linyon Eropeen, me travay nou gouvènmman i fer ki ozordi nou lo ‘Grey list’ e byento nou pou vin lo ‘White list’. Se sa en gouvènmman serye ki sa pep ti elekte an 2020 e ki pe delivre san ses pour son pep e fer nou pei fyer. Mon tya demann tou bann ki war pei pe koule e pe kriy tir li, dir mersi osi ki nou lekonomi I for e ki bann ki reve diriz sa pei, omwen rekonnet ki sa ladministrasyon in travay dir e ki sa 5 nouvo prezidan avek 35,000 vot sakenn ki Sesel pou gannye an Septanm 2025, zot pa pou vin zwenn sitiasyon 2020 avek en kof vid. Noun ranpli kof e la ki in plen mon envit tou bann oportinis ki pann donn en koudmen pandan letan dir pou omwen servi sa bann mwan avan zot mont State House ansanm pou debout lo kote sa pep e fer en kontribisyon pozitiv olye zis koze. Met en kou lanmen dan zot pos ranpli ek lanm e fer en kontribisyon dan devlopman nou pei e sa ya permet zot ganny 36,000 vot sakenn.

Mr Speaker, sa ladministrasyon in sirmont tou defi kin tonm lo li. Lager Larisi/Ukraine in annan lenpak direk lo nou lekonomi e fer tou pri komodite ogmante akòz pri transportasyon in ogmante. In osi detri en bon marse touristik an Ukraine. Konfli Izrael/Hamas in osi annan son konsekans grav par detri nou lendistri touris, nou ganny-pen, akòz marse Izrael in tonbe konpletman e Air Seychelles, san oubliy bann letablisman lospitalite in perdi en bon marse. Noun sirmont sa e nou ankor pe flote. Ozordi nou pli determinen ki zanmen !

Mon realize ki pli gran lafors ki sa ladministrasyon in annan se pou pran meyer desizyon pour nou pep. Noun reziste tantasyon pou pran desizyon popilis ki tya donn nou plis sipor, me plito noun pran desizyon difisil e apropiye ki pou donn nou plis rezilyans e permet nou

konstri en pli bon demen pour tou zanf an Sesel. Se sa ankòr enn fwa kin ed nou pei pou avans devan. Pou ferm URS ti en desizyon brav ki ti anmenn kritik politik. Me ozordi, eski pa nou fyer letan nou war bokou sa bann zenn ki tya pe vye dan bann tel program pe debout e pe debourye dan lavi? Tazantan dan bann program nou war zot sa bann zenn debouryer pe rakont zot zistwar sikse. Sa I donn mwan personelman gran plezir akòz sa bann zenn pe kapab form parti sa group zenn antreprenner solid ki pe ede devlop nou zoli pei ozordi e demen.

Dan menm fason pou termin program FA4JR ti anmenn bokou kritik, me eski ozordi pa nou war tou bann biznes in rebran e menm bann ki ti pe abize pe retourn larzan ? Sistenn imigrasyon SEBS osi ti ganny kritik, me ozordi Sesel I ganny rekonnèt e bokou pei pe servi nou legzanmp dan zot sistenn imigrasyon. Entrodiksyon 13enn mwan koman en sistenn baze lo evaliasyon en travayer pou anmenn plis prodiktivite tin vin en foutbal politik, me ankòr enn fwa, ozordi travayer menm ki koz byen lo sa fason fer evaliasyon akòz zot dir ki sa pe pous bann ki trenn lipye pou prodwir plis. Alor, nou ladministrasyon in sanz fason fer pou met lanfaz lo vin responsab e sa i dan benefis nou pei. I annan bokou ankòr pou fer dan sa direksyon.

Dan menm fason mon kontan letan mon antann serten politisyen pe koz lo Air Seychelles ek bann gran plan ki zot annan. Me eski zot oubliye ki zefor ki sa ladministrasyon ti bezwen fer pou sov nou lalinny aerien? Zot oubliye ki nou ti bezwen negosye, fer Air Seychelles rantre dan Ladministrasyon pour nou kapab sov li e kit li anvole san ki en sel lanplwa ti ganny perdi? La mon anvi montre gratitud anver bann travayer Air Seychelles zot menm pour zot sakrifis e tou ki ti aksepté en bes dan lapey. Zot in montre ki savedir sakrifis pour pei e pour sa nou tou nou dir avek zot 'chapeau!' Wi, ozordi sa lakonpanyen pe rebran e avek sa byensir nou bezwen regarde ki mannyer zot ganny regarde pli pre. Air Seychelles in komans anrezistre en pti profi e i pe kontinyen regard bann nouvo larout dan rezyon kot son avyon i kapab ale. Alor nou pou kontinyen swet zot tou debon. Mr. Speaker, mon konnen kote zot sorti akòz mwan personelman monn akonpany zot, monn negosye e ede pran meyer desizyon. Pa ti fasil, me noun reisi fer li.

Mr Speaker, nou ladministrasyon pe kontinyen met bokou lanfaz lo devlopman imen. Bann fleo sosyal i fer ki bokou presyon ozordi i ganny mete lo bann lekòl e plis zanf an pe ganny mete dan bann fwaye kot zot kapab ganny proteksyon. Sa osi i anmenn son prop defi. Rol

lafanmiy in diminyen e nou bezwen ansanm retourn responsabilite zanfan kot paran e enkli bann NGOs ek lorganizasyon relizye pou ede konstri fanmiy pli stab ki donn sa sekirite apropiye. I tris letan ou war bann zenn pe grandi dan latmoser pa apropiye kot i fasil pou annan labi. Sa i rezon aköz nou pe kontinyen lager kont sa bann pti kwen dan bann kominote kot aktivite ilegal e kriminel i kontinyen arive. Mon enplor tou paran pou vin pli responsab anver zanfan ki zot in anmenn lo later afen ki zot kapab ganny meyer loportinite dan lavi e vin bann sitwayen responsab e serye ki fer en bon kontribisyon dan devlopman zot pei demen.

Mr. Speaker, Nou pe war devlopman akademik nou bann etidyan kontinyen lo en tre bon nivo malgre ki nou bezwen fer plis. Sepandan nou bezwen rod tou fason pou ankouraz plis zenn Seselwa pou rantre dan profesyon lansennyman afen ki nou kapab koup lo lakantite etranze e devlop nou sistenm pli byen. An menm tan mon kontinyen ankouraz tou nou zenn pou pran zot letid o-serye e fer pli byen posibil, aköz apre tou se zot ledikasyon ki sa lakle ki pou ouver zot laport demen.

Mr. Speaker, monn mansyonnen ki ledikasyon I lakle pour tou devlopman imen. Me letan bann fleo I bat nou zenn, byensir nou pou war sa reflekte dan laklas. Mon pe ensiste ki nou gard nivo disiplin dan lekol lo en nivo pli o posibil afen ki latmosfer lekol i ava reste enn ki ankouraz letid serye e progre endividyel. Letan mon dir sa, mon osi rekonnèt ki avek mank ansenyan i annan plis presyon travay e sa dan limenm i en dekourazman. Annou ansanm rod bann solisyon apropiye pour ki nou ava transform sa sitiasyon difisil ki ozordi i en tandans mondyal dan enn ki ava pli agreab e permet nou bann zenn ganny tou sipor neseseur pour zot epanouisman.

Tou defi i devret ganny pran o-serye, parey sa dernyen letid in montre ki I annan serten febles dan STEM Education dan Sesel, savedir ki nou bann etidyan pe montre serten febles dan bann size Lasians, Teknolozi, Letid Enzenyer ek Matematik. Nou bezwen adres larealite e pran aksyon apropiye pou rektifye sa mankman. Menm parey ki nou pa satisfè avek lakantite etidyan ki pe ganny grad C e pli o lo nivo IGCSE. Pour A levels osi nou pou bezwen ankouraz nou bann etidyan pou fer pli byen.

Sa i anmenn mwan lo letid liniversite. An-mezir ki nou rod devlop UniSey e fer bann korperasyon avek lezot liniversite, i esansyel ki nou regarde ki mannyer pou ofer plis

posibilite etidye isi olye war sa gran nonm etidyan ki al Malezi e lezot pei, ki byen sir kout pei bokou. Annou rod bann fason kot etidyan I kapab fer tou lede. Pas enpe letan isi e serten lannen deor Sesel. Mon krwar ki nou zenn i bezwen sa louvertir ver letranze pou donn en lot perspektiv lemonn. Tou demars pe ganny fer pou sanz stati UniSey pour ki i ava sorti koman en lasosiasyon e annan son prop lalwa. An menm tan osi, nou pe finaliz propriete ki pou ganny dezinyen koman ‘campus’ UniSey. Sa i dan son staz final. Bokou pe arive e mon napa okenn dout ki nou ava kapab devlop sa liniversite Sesel plis ankor, e ki plis Seselwa i ava kapab fer zot letid ziska lo nivo doktora lokalman.

Mr. Speaker, noun osi pran devlopman nou bann zofisye dan servis piblik o-serye. Sa lannen en dezyenm group profesyonnel in partisip dan program leadership ofer par UAE. Sa i en gran lankourazman e nou dir merci pour sa posibilite ki noun gannyen. Aprezan i reste pou met bann proze ki zot in travay lo la an-aplikasyon pour devlopman nou pei.

I annan bokou plis kors ki pe ganny ofer lo size ‘management’ pour bann diferan dimoun dan bann diferan lenstitisyon kot TGMI. Tou sa la avek bi ranforsi leadership dan servis gouvernman. La mon bezwen admet Mr. Speaker ki noun idantifye sa koman en febles, e pour nou pei avans plis devan, fodre ki plis teknisyen i kapab osi ganny bann skil nesaser pour zot vin bann dirizan dan zot landrwa travay. Avek sa konesans ki zot annan, zot ava kapab vin pli bon dan pran bon desizyon ki anmenn solisyon pli agreab pour tou, dan tou sitiasyon.

Mon anv i dir byen for e byen kler ankor enn fwa ki tou travayer dan gouvernman I bezwen annan sa lorientasyon pou delivre en servis, pli vit e pli efikas. Mon lans en challenge avek tou departman pou redwir sa birokrasi e otan ki posib donn en larepons dan mwens ki en semenn. Annou pran sa koman en defi pour 2025. Mon pou swiv sa tre pre.

Mr. Speaker, nou lendistri prensipal, tourism, I reste lo bon semen malgre bann diferan komanter ki nou tande. I annan bokou analiz ki nou bezwen fer letan serten i dir napa touris. Ozordi i annan bokou plis fasilite pour nou bann viziter reste premyerman. Alor avek plis swa, serten landrwa ki ti abitye plen pa pe ganny sa menm kantite viziter e bann nouvo letablisman ki fer lezot kalite marketing pe pran kliyan. Sa pa vedit ki napa touris ki pe vin Sesel, me i plito vedit ki serten landrwa pa pe ganny kliyan. Se la ki aprezan napa ki pa ganny dir e tou kalite konparezon i ganny fer. Me kwa ki larealite ?

Ler nou regard performans tourizm an 2024, nou vwar en gran sanzman pozitiv konpare avek performans an 2020, ki ti dan letan COVID. An 2020, en total 114,858 viziter ti ganny rikorde. Sa ti en rediksyon 70% konpare avek 2019. Lakantite viziter an 2024 i apepre 207% pli o ki sa ki ti ganny rikorde an 2020. Sa i swiv nou zefor apre pandemi e louvertir erport an Mars 2021. Lerop i reste marse prensipal avek en kwasans 244% dan kantite viziter an 2024 konpare avek 2020, avek laplipar viziter sorti Lalmanny, Lafrans ek Larisi. Dan rezyon Lazi, viziter in ogmante par 94% an 2024 konpare avek 2020, avek bon performans sorti kot Emirab Arab Ini (UAE).

An 2024, Sesel in rikord en total 352,762 viziter. Menm si sa sif i enpe par anba nou target estimen ki ti 357,900, sa i reprezant en ogmantasyon 0.5% konpare avek lakantite viziter an 2023, ki ti 350,879. Lerop i reste nou pli gran sours viziter avek en kontribisyon 73% lo total viziter.

Reveni tourizm ti desann sorti US\$ 856 milyon an 2019 pou ariv US\$ 327 milyon an 2020 apre pandemi Covid 2019. Performans reveni dan sekter tourizm pour lannen 2024 in ganny estimen pou ariv US\$ 986 milyon, savedir pli o ki an 2019, malgre lakantite touris i mwens ki an 2019.

Previsyon pou lakantite viziter i reste enn ki pozitiv pou 2025, avek en estimasyon 361,581 viziter total ki reprezant en kwasans 2.5% konpare ek 2024. I annan bokou zefor ki pe ganny fer par lotorite konsernen, tel ki louvertir pou resevwar plis avyon ki vin Sesel sorti dan nouvo marse tel ki Lenn, Lasin ek Larabi Saudit.

Mr. Speaker, i enportan a sa pwen pour mwan remet lanfaz e fer tou dimoun konpran ki lendistri touris pa depann lo zis Gouvernman atraver Minis Touris, me i en lendistri ki konsern nou tou. Nou pe vann Sesel dan sa lendistri. Alor, letan nou deside fer Sesel vin en dustbin deborde, letan nou atak ek vol kliyan, letan napa en sourir pou akey sa viziter, letan nou trangle kliyan avek bann pri ekzorbitan, letan en senp kours i kout en fortin, letan nou mal resevwar nou viziter, nou pe fer en sel keksoz : Nou pe touy sa lendistri ki anmenn plis reveni dan nou lekonomi e ki permet nou met manze lo latab nou fanmiy.

Eski i tro bokou pou demande ki non selman ki bann otelye e lezot ki ofer servis direk i zwe zot rol dan en fason konsansye, me ki sakenn antre nou osi i konsider nou lekor koman en azan dan promosyon sa lendistri ek Sesel ? Annou mazinen ki ozordi i annan en kantite konpetisyon e dan Losean Endyen i ranpli avek rival. Alor annou reste ferm e serye dan prezervasyon nou ganny-pen prensipal. E la mon profite pou dir mersi tou Seselwa, tou lazans, tou partener e tou travayer pour zot devosyon ki zot mete pou fer sezour nou bann viziter agreab e fer zot ganny lanvi retournen.

Mr. Speaker, enn bann size enportan I TRNUC. TRNUC i pros avek mon leker. Parey tou dimoun i konnen, se mwan ki ti inisye sa demars a-traver en mosyon dan Lasanble Nasyonal an 2016. Mon kontan ki premye parti sa demars, konn laverite, in kapab realize a traver TRNUC e partisipasyon bokou Seselwa kin vin devan pou fer nou pep konnen ki ti vreman pase dan lepok Parti Inik. Lannen pase, Lasanble Nasyonal in pas en mosyon pou rekomande ki prosesis ki nou devret pran konman en nasyon pou konklir travay sa komisyon. Zot in propoz lapwentman sa ‘successor body’ pou konklir travay sa komisyon, e zot ti rekomande ki sa lorgann i fer rekomandasyon lo en repozitwar pou bann arshiv TRNUC, pou propoz en moniman pou rekonnèt viktim, e pou propoz mezir reparasyon. Monn ekout zot, e monn apwent en ‘successor body’.

Koman en dimoun kin viktim bann atosite kin ganny komet dan nou pei e kin zwe en rol dan letablisman sa komisyon pour lepep Seselwa konn laverite e mars dan semen linite e rekonsiliasyon nasyonnal, mon bezwen admet ki lanfaz ki ganny mete lo konpansasyon I parfwa ganny konsidere koman en lobzektiv kin ‘hijack’ bi prensipal sa lekzersis. Sa I kapab anmenn diferan santiman parmi nou popilasyon an-zeneral. Latan sa pep ki’n soufer an silans isi Sesel pandan sa bann lannen fernwar, sibir curfew e viv dan dout ek lafreyer avek nouvel disparisyon, touye, perdi lanplwa, tortir etc.. i antann zis koz milyon par isi e milyon par laba, vann zil pou pey konpansasyon, fer tax-payers peye, e bokou lezot keksoz, mon krwar ki i pa anmenn nou dan bon direksyon. Mon pou kontinyen met lanfaz ki nou pep i bezwen inifye pour nou kapab akonplir bann gran rev ek plan ki nou annan pour nou zoli pei Sesel.

Parey in ganny anonse, en Komite sikseser sa komisyon in ganny apwente e an se moman, negosiasyon pe ganny fer lo alawens ki sa 3 dimoun pou gannyen e egzaktaman dan ki kad legal ki zot pou travay. Le moman ki sa yan fini ganny fer, tou dimoun i ava ganny enformen. Me mon bezwen osi fran lo sa size konpansasyon. Mon ladministrasyon in zis ranmas det ki

sa ladministrasyon avan in fer. Lakour in demande ki nou pey Mr. Alain St Ange R7m akoz Ladministrasyon avan ti tir son nominasyon WTO, noun pey konpansasyon delo La Misere, e sa pankor fini akoz preferans peyman, noun pey konpansasyon PUC, Praslin e sa osi pankor fini, i annan peyman konpansasyon fungus dan plizyer departman gouvernman, e pa oubliye ki la pour le moman bann zeritye Dr Delhomme in met en kes ankor e atraver zot avoka Mr Boullé, pe demann plis ki R300m konpansasyon lo later ki ti ganny pran. Alor annou pran tou sala an-konsiderasyon e pa zis dir ki gouvernman napa bon lentansyon, me annou vin bann realis e demande kote larzan pou sorti akoz lalinny konpansasyon ki ansyen rezim in kite i vremen long. E parey zot osi war, sa parti ki rekonnet i sikseser sa enn anba ki tou sa bann atosite ti ganny komet akoz menm si zot dir ki zot ‘A new United Seychelles’ zot in selebre 60an, i vann propriete pour santenn milyon roupi, me i pa enterese fer okenn kontribisyon !

Antretan osi, i annan lezot travay kin ganny fer an sa ki konsern retourn propriete ki tin ganny pran par rezim sa letan ki pann devlope. Plizyer dimoun in deza ganny zot later avek bann kondisyon ki zot in dakor avek, tandi ki lezot i ankor pe negosye. Mon espere ki byento tou sa bann kes i ava ganny konplete e sa dan limenm i ava en lot paz dan sa listwar nwanr nou pei ki ava ganny vire.

En lot letap sete letan nou ti sanz non tou semen ki annan pou fer avek kou deta. Mon kontan ki ozordi memwar sa bann non ki reflekte disan Seselwa ki ti ganny verse, enkli sa ki pour mwan, PM Ferrari ek lezot Seselwa in ganny retire.

Lo lot kote, en konpetisyon ti ganny lanse pour 2 moniman ki ava komemor tou dimoun ki premyerman ti ganny anprizonen ilegalman Prizon Union Vale, dan kord gard, Lil Long ek Gran Polis pour rezon politik. Noun osi pibliy bann non dan zournal Nation pour ki si okenn non i manke, pour kapab rektifye e azoute. Mersi tou bann kin fer sa e ede dan sa demars.

Dezyenm moniman i pou dan memwar tou bann dimoun kin perdi zot lavi dan sa peryod. Se zot sa bann kin pey pour nou laliberte ek demokrasi atraver zot lavi.

Bokou dimoun ti partisip dan sa konpetisyon e byento nou pou anons bann gannyan ki zot propozisyon in ganny konsidere. Landrwa pou met sa 2 moniman in fini ganny idantifye – enn pour kot Prizon Union Vale ti ete e dezyenm pou kot Peace Park. Tou demars pe ganny fer e si tou i mars byen zot ava ganny inogire a-lokazyon bann lafet nasyonnal an Zen.

Ankor enn fwa, fodre pa nou oubliy nou pase, anka ki nou repet menm fot. Labi drwa imen napa plas dan lavi en pep e sirtou napa plas isi Sesel. Mor dan en rigol anba en pon fodre zanmen ganny repete dan Sesel. Lalwa i devret par lao tou dimoun a tou moman.

Mr. Speaker, tou dernyerman size lotel lo Zil Asompsyon in en size enportan dan nou pei e mon war li koman mon responsabilite pou adres sa size. Premyerman, les mwan fer kler ki anba mon ladministrasyon ki la depi Oktob 2020, napa okenn zil Sesel kin ganny vann. Tou zil ki pour leta i ankor pour leta Seselwa e napa okenn ki nepli pour Sesel. In annan zis 2 tranzakyon ki konsern zil Sesel kin arive anba mon ladministrasyon. Enn i konsern Lil Long ki parey nou tou nou okouran i annan omwen 20an depi ki ladministrasyon avan in esey devlope, me napa nanryen kin arive. Mon ladministrasyon in senpleman rebran sa lease e fer piblisite pour nouvo investiser montre lentere e vin devan. Plizyer ti partisipe e enn in gannyen. Sa menm kondisyon parey avan, savedir pou lwe zil antye in ganny aplike e bann kondisyon devlopman in sinnyen e nou espere ki sa zil i ava war travay konstriksyon dan en pli kourt dele posib.

Dezyenman lo Zil Assompsyon ti osi annan en lapel lof pour en devloper vin devan. Zis enn ki ti vini, e alor i ti ganny sa posibilite pou lwe en parti sa zil pou fer en lotel 37 lasanm. Tou bann prosedir in ganny fer e plan in fini ganny aprouve e tou kondisyon lanvironnman pe ganny swiv e travay in fini komanse.

In annan plizyer konsern an-relasyon avek proksimite avek Aldabra, en sit leritaz mondyal avek en biodiversite frazil. Bann dimoun dan lanvironnman, spesyalman SIF ek lezot in prezant zot pwennvi lo sa devlopman. Dan sa konteks, e konsyan mon rol konman Patron SIF, monn angaz avek SIF, IDC ek devloper sa proze lo Assomption. Direksyon ki sa konversasyon pe pran, se ki SIF, IDC ek devloper i ava tonm dakor ki se SIF ki pou ansarz tou sa ki konsern biosekirite ek biodiversite lo Asompsyon. Se zot ki ava kontrol Asompsyon lo sa nivo e bann devloper ava pey SIF pou fer sa travay. Dan sa fason Aldabra i ava resevwar sa proteksyon total e biodiversite Asompsyon limenm i ava ganny proteze parey tou dimoun i anvi. Mon anvi ki nou ganny en rezilta 'win-win-win'.

Me mon ladministrasyon pa pou aret la. Nou anvi asire ki tou Seselwa ki anvi vizit Asompsyon ek Aldabra i ganny akse a tou moman. IDC i deza annan en program pour

Seselwa kapab reste lo bann zil ki i okipe parey lo Platte, Desroches, Silhouette, Alphonse, Farquar ek Remire. Lo Asompsyon osi, sa bann fasilite pou ganny kree, e lotel osi pou annan bann pri spesyal pour viziter Seselwa.

En lot eleman ki kapab anmenn en lamannman Konstitisyonnèl se demars ki sa ladministrasyon pe fer pour ki Group Aldabra, ki konpli Atol Aldabra, Atol Cosmoledo, Atol Astove ek Zil Asompsyon i ganny proteksyon spesyal an sa ki konsern devlopman ek proteksyon sa group zil kot i annan pli gran biodiversite dan nou larsipelego. Sa i ava enkli ki zanmen en baz militer etranze i ava ganny konstri lo okenn sa bann zil. Se Lasanble Nasyonnal ki pou annan sa responsabilite pli tar sa lannen pou fer sa lamannman Konstitisyonnèl.

Mr Speaker, ant le 1-11 Me sa lannen, Sesel pou vin premye pei Lafrik pou organiz FIFA World Beach Soccer Tournament. E sa pou osi premye fwa ki Sesel i organiz en konpetisyon lo sa nivo kot ziska prezan noun war bann lekip tel ki Italy, Portigal, Senegal, Lespanny, Tahiti ek Moritani kin kalifye. Pandan sa bann semenn ki pe vini bann lezot lekip pou kalifye e sa pou fer ki an tou 16 lekip, ki pou sertenman enkli Brezil, gannyan sa tournwa plis fwa, pou vin zwe lo disab Sesel. I pou osi fer ki premye fwa ki Sesel i partisip dan en konpetisyon lo sa nivo.

Mon bezwen premyerman felisit nou lekip ki pe pran sa konpetisyon vreman serye. Zot pe pran zot lantrenman lo en lot nivo e letan mon ti zwenn avek lekip, sa nivo lantousyasm ti vreman o. La ki bann antrener Larisi i avek lekip, sa travay in bouz lo en lot nivo. Ansanm avek Sesel an-antye nou anvi dir zot ki nou pe sirport zot e nou swet zot bonn sans.

Mr. Speaker, organiz sa tournwa pann vin avek son defi. In annan bokou dezapwentman, spesyalman avek sa dimoun ki ti sipoze rod larzan sponsor e ki ti donn son parol menm an-ekri, me ki finalman ni en sou Morisyen, parey granmoun ti dir pann anmennen. Ozordi nou pa ni konnen ki son rol koman tyermenn dan lorganizasyon sa konpetisyon. Me nou en gouvènmman determinen e nou pa pou zanmen les Seselwa tonbe. Noun fer tou demars, e avek lafyerte mon pou dir ki i annan en lekip solid ki pe fer sir ki tou keksoz i arive. Tou le semenn sa lekip i zwenn State House, e bomaten menm nou fek zwenn kot tou dimoun I ganny en update lo kote nou ete. Gouvènmman in bezwen investir, me la mon anvi osi remersye 2 lorganizasyon kin fer donasyon \$5milyon pou asire ki tou keksoz i mars byen. Se

sa enpe bann demars ki mon fer letan mon vwayaze. Mon fer sir ki mon retourn avek plis ki mon bidze vwayaze, ki pour zot lenformasyon i R6.4m me ziska la monn servi R347,000 prensipalman avek en delegasyon ki nou ti bezwen anvoy Dubai pour laranzman Beach Soccer, me dan mon vwayaz monn retourn avek environ R100m pour benefis Seselwa. Mon profite pou envit tou dimoun ek lorganizasyon ki anvi fer en donasyon pou apros NSC e anmenn zot kontribisyon.

Me Mr. Speaker, mon anvi felisit sa lekip solid ki pe travay vreman dir e ki pe pran tou keksoz an-men. Byento mon pou fer Sesel antye konnen lekel sa bann dimoun ek lorganizasyon. Mon swet zot tou kouraz ek tou lafors dan sa latas ki zot pe antreprann. Zot bann vre dimoun ki kontan Sesel e zot pe fer li avek gran lanmour e gran leker. Alor mon donn Seselwa randevou an Me pour sa konpetisyon vreman enportan e pou vin siport nou zenn lekip.

Zisteman letan nou lo sport, mon anvi prezant nou kondoleans avek lafanmiy Hoffman apre ki enn nou gran atlet kin anmenn meday pour Sesel, Chantal Hoffman in kit nou. Nou dan sok. Nou dir Chantal mersi e i tya pe travay avek nou bann zenn pour CJSOI. Repoz anpe mon ser.

Tou dimoun in sirman remarke ki bokou nou bann fasilite sportif swa in fini renouvle oubyen i anba renovasyon. Stad linite in ganny en nouvo teren football ek nouvo lalimyer, tandi ki tartan track in sanze e enn nef lo standar enternasyonnal in ganny enstale e nou bann zenn ti inogir li lannen pase atraver en 'School Relay Festival'. Tou fasilite 'changing rooms' pe ganny refer e le moman ki sa i fini, nou ava kapab war match football enternasyonnal ankor enn fwa Sesel. Tou bann kort tennis in fini refer e inogire. Palais de Sport osi pre pou terminen la ki son 'flooring' in fini rantre dan pei. Kot dojo twatir i sipoze sanze, tandi ki travay kot School Meals Centre travay in fini komanse. I osi annan lezot fasilite sportif ki nou pe al travay lo la, oubyen konstri.

Mr. Speaker, mon bezwen osi enform lepep Seselwa ki tou bann preparasyon pour CJSOI I osi pe deroul byen. Sa komite pe fer en bon travay e mon napa okenn dout ki tou lorganizasyon pou pas byen e bann zenn dan nou rezyon, environ 1500 zot pou pas en bon letan isi Sesel pour sa zwe. Mon bezwen azoute ki parfwa letan mon war bann komanter negativ, mon zis swete ki sa bann dimoun ki servi zis zot ledwa lo en keyboard pou ekri tou

sa bann gonaz tya zis pran en pti letan pou koz avek sa bann ki pe mank sonmey zis aköz zot angaze e swet zot kouraz pou reisir. Pa dekouraz sa bann dimoun, me rode ki mannyer pou siport.

Mr. Speaker, mon pa kapab fini sa sapit san adres bann federasyon ek bann asosiyasyon ki ansarz bann diferan sport dan Sesel. Wi, se zot ki fer marse sport, me tro souvan i annan bann lentere personnel ek bann azanda ki pa fer dibyen sa bann sport. Zenn atlet i dekouraze aköz sa bann azanda personnel. Eleksyon komite I ganny melanze avek en loder koripsyon, e olye ki nou war talan I ganny posibilite pou devlope e epanouir, nou war zenn potansyel ki dekile. Eski zot kapab arete avek sa kalite latitud? Eski zot kapab vin bann vre responsab ki azir koman bann fasilitater olye fer preferans e detri sa sport pour ki zot in ganny elekte? Eski nou kapab war zot sport vin enn ki atir plis zenn ki ava fer monte paviyon Sesel e non pa zot letere personnel ? Mon swete ki mesaz i kler aköz mon vremen dekouraze letan mon war sa bann konfli parmi bann adilt e mon war nou bann sportif ki vin viktim sa bann konfli personnel. Donn sport Sesel tou sa posibilite pou grandi e devlope silvouple.

Mr. Speaker, noun fer bokou dan sa 4 dernyen lannen avek tou bann resours ki noun kapab kree pour nou pei. Larises in al ver nou pep. Tou proze ki noun antreprann se nou pep kin benefisy e pli enportan noun fer tou pou asire ki napa okenn koripsyon e ki prosedir apropriye i ganny swiv. Se sa ki fer ki lofis Oditer Zeneral pann trouv li neser pou raport lo okenn proze. Pa toultan kin fasil, me se nou determinasyon kin fer nou reisir. Me nou pa pou aret la. Okontrre konfor nou pep i nou priorite.

Nou network semen ozordi i donn nou lafyerte. Preski tou bann semen prensipal in ganny en nouvo kous koltar e ganny agrandi kot fodre. Ki i semen lavil-Beau Vallon, semen Bois de Rose ziska stasyon Seypec, dual carriageway Eden ziska Pangea, erport pou Pointe Larue, Anse Royale pour Anse La Mouche an-pasan par Marivi, kin vin en highway, semen Vallée de Mai- BSA, Anse Boileau ek tou sa bann lezot semen kin ganny fer dan bann vilaz tel ki Semen Lafous, St Joseph e tou sala i reflekte en program serye ki fer nou fyer. Zot dir ki ou ganny en bon lendikasyon leta en pei par kondisyon son semen. Sa i reflekte byen pour nou Sesel. Se pour sa rezon ki tou dimoun i anv i asosye zot avek Sesel ozordi. Nou top partou kote e sa ladministrasyon pou kontinyen asire ki nou kontinyen fer pli byen ankor.

Mr. Speaker, mon masyonnen ki nou met lanfaz lo proze ki benefisyé nou pep. Pandan sa bann lannen depi ki nou ganny responsabilite sa pei, nou war linogirasyon bann fasilite pou peser La Retraite, Anse Etoile, Glacis, Anse Aux Pins, Cascade, Grand Anse e Baie Ste Anne, Praslin e La Digue. Sa bann fasilite in vin dan laform bazar, landrwa pou store masin, agrandisman pou mouy bato, fasilite ice ek lezot ankor. Nou enterese avek sa lendistri e nou pe donn tou lankourazman nou bann peser. E ki pli bon fason pou ilistre sa ki par entrodwir en sistenm pansyon pou tou peser ki enterese. Nou pe pran swen avek zot letan zot pou pran zot retret.

Dan sa menm konteks, ozordi Praslin i annan en nouvo terminal pasaze lo por kot touris i pas dan pli gran konfor e nou bann pti antreprenner i kapab ganny lavi. La Digue osi pou benefisyé avek bann menm fasilite byento. Sa i ava fer ki tou dimoun ki vwayaz par bato i ava eksperyans vre konfor letan zot pe atann e letan zot debarke. Letan nou regard bann nouvo fasilite ek louvertir pou biznes, mon vreman fyer e mon demande ki tou dimoun i servi tou sa bann fasilite byen e pou gard zot koman en lafyerte pour nou. Nouvo terminal lo Praslin in asire ki gard lakot i ganny son prop fasilite kot son pli gro bato I kapab koste e sa i permet pou annan pli gran sipervizyon lo bann zil pros.

Mr. Speaker, nou militer i zve en rol tre enportan dan lavi nou pep. Pli bon fasilite ek resours pou permet zot fer pli bon travay. Sa vre kolaborasyon ant bann diferan brans, savedir Special Forces, Air Wing avek Gard Lakot in permet gran sikse dan bokou loperasyon lo lanmer. Dav ek drog, bato lapas ilegal Sri Lanka, Malgas ek Komoryen in ganny arete, loperasyon sov dimoun an-danze in ganny fer e transportasyon maladi ant La Digue ek Praslin, oubyen Praslin ek Mahe I parmi bann loperasyon ki sa bann zonn ek fanm dan liniform I fer pour nou pei pandan ki bokou pe repoze aswar.

Byento nou pou war konstriksyon en nouvo jetty pour nou gard lakot, apre ki semen koltar pou al lo nou baz lakot in ganny konstri. La mon profite pou remersye gouvènmman Sinwan ek Endyen pour sa de nouvo bato patrol. Mardi ti annan seremoni kot Lenn ti delivre en bato, Boudeuse e byento Lasinn pou remet en bato grander Etoile, ki nou apel Andromanche, ki ava ede dan bann patrol. Nou bezwen osi remersye gouvènmman Bahrain kin fer nou kado 4 fast boats ki pe zve en gran rol dan bann loperasyon parmi bann zil pros. Kan larme Lekzil in fini sorti e bouz Barbarons. Tou sa i fer ki militer ozordi i totalman endepandan e avek plis

training, nou lafors pe konsantre lo travay enportan dan devlopman ekonomik nou pei. Seselwa i fyer pour travay ki zot fer e nou dir zot bonn sans e kontinyen met Sesel premye.

Mr. Speaker, tou lezot lafors sekirite pe kontinyen fer zot mye. Travay I bokou e lapolis I osi azout zot bout pou reponn a tou lapel sorti kot piblik. Lakantite krim ki ganny detekte i kontinyen ogmante, malgre i pa ankor ariv 100%. Tou zefor pe ganny fer pou donn plis lantrenman afen ki nou lafors i vreman vin enn ki profesyonnel avek tou resours imen neseler. I annan bokou travay pou fer e mon tya kontan felisit tou polisye ki fer en bon travay e pran zot responsabilite o-serye. Se zot ki anmenn sa lafyerte parmi nou pep. Mon vreman kontan letan mon war bann komantr pozitiv. Me malerezman i annan ki donn lapolis en move non, me konmsi sa pa ti ase, se zot premye pou mont lo FB pou kritike. Akoz zot pa komans par dir lepep Seselwa ki zot in fer koman gard e menm poste zot bann portre !

Me i tre enportan pou mansyonnen ki sa gran travay kolaborasyon ant servis lentelizans, militer ek lapolis in permet ki plizyer krim in ganny dekouver e aksyon legal in kapab ganny pran. Mon profite pou felisit tou bann zofisye kin partisip dan sa bann loperasyon kin ede pou protez nou popilasyon e elimin kriminalite. Sa i montre ki sa desizyon pou fer sa lamannman Konstitisyonnal ti bon e neseler.

Mr. Speaker, byensir lozman nou pep i enn ki tre enportan pour nou. Se pour sa rezon ki letan serten dan sa Lasanble tya pe dir kensel tou bann proze kapital tel ki konstriksyon lakaz, nou ti refize swiv sa konsey. Nou ti rezet en tel propozisyon akoz sa ti pou fer nou pep soufer. Zis mazinnen ki ti pou arive pour en segonn. Tou sa bann proze lakaz Cascade, Corgate Estate, Port Glaud, Bel Ombre, Pointe Larue, English River, Bel Air, St. Louis, Glacis, Perseverance ek bokou lezot distrikt pa ti poun ganny konstri e mazinnen konbyen fanmiy ki ti ava ankor pe reste dan en lakaz ankonbre olye dan konfor zot prop lakour kot zot fanmiy ti ava pe grandi byen avek en landrwa apropriye pour zanfann fer zot homework.

Sa lannen nou pe ogmant bidze pou asire ki plis lakaz i ganny konstri e plis kare later i ganny met a-dispozisyon nou pep. Antretan nou pe osi fer sir ki plis dimoun ki pe fer zot kontribisyon i kapab ganny asiste avek part-rental pandan ki zot pe esper zot prop fasilite. Tou sa la pour nou asire ki nou pep i ganny li sa konfor neseler pour ki sak fanmiy Seselwa i kapab byen epanouir. Se sa ki sa ladministrasyon i rode pour sa pep ki nou kontan en kantite. Nou lo bon semen e nou swete ki nou ava kapab fer plis ankor dan bann lannen ki pe vini.

Dan menm lalinny, tro bokou dimoun kin aste flat e kin fini peye pa ankor ganny zot lavant later, parfwa apre plis ki 10 ou 20-an. Sa pa akseptab. Tou dimoun kin aste en lakaz i bezwen son lavant later. Retar se akoz sa bann blok flat ti bezwen ganny survey e anrezistre anba Condominium Property Act. Mon fyer pou dir ki sa travay in akselere dan sa bann dernyen mwan e ki en lese pe ganny fer pou ki dan sak blok lakaz en dimoun pou ganny apwente par bann rezidan sa blok konman en Condominium Manager pou asire ki sa blok I ganny servi byen, ki maintenance I ganny fer ler I fodre e ki zabitan I viv byen. Bann zabitan kin aste zot lakaz pou ganny zot lavant osito ki posibil.

Mr. Speaker, I kler osi ki lazans SIA pe fer en travay forminab dan met sa bann progre an-ord e akonpany menm rezidan dan zot maler. Bokou proze gouvènmman in ganny enpe retar apre lensidan le 7 Desanm senpleman akoz SIA in sa lazans prensipal pou fer tou bann evaliasyon e responsab pou resevwar e menm fer peyman pour reparasyon ek rekonstriksyon bann lakaz zabitan. Mon fyer pou dir ki tou sa travay in byen ganny fer e ozordi bann dernyen peyman pe ganny fer. SIA i osi sa lazans ki pe diriz bann preparasyon pour FIFA World Beach Soccer an Me e pour CJSOI pli tar. Mon vreman apresye tou sa lenerzi ek zefor ki ganny mete pou asire ki proze i ganny byen planifye e ekzekite. Ki i konsern en renovasyon, en nouvo konstriksyon, en konsey, en proze lanvironnman pou protez lakot, en nouvo lopital, en lekol, en desarz pou anpes linondasyon oubyen nenport kalite proze, nou kont lo SIA ek son bann zofisye pou dirize. Ankor enn fwa, felisitasyon e bonn sans dan tou sa ki zot kontinyen fer dan devlopman nou pei.

Mr Speaker, tou minister dan ladministrasyon I fer sir ki nou pep I ganny byen regarde. Pandan dezas ek maler e dan proze pour benefisye nou bann kominote, nou kontinyen regarde ki mannyer pou byen depans larzan lepep. Sa santenn pti proze ki ganny akonpli sak lannen atraver Gouvènmman Lokal i asire ki sa pti semen, sa peron ek lezot proze kominoter i permet sa dimoun avek kek dezabilite, sa vyeyar oubyen sa ki malad sirkil dan plis sekirite. Nou bann DA ek zofisye dan distrikt i sa group dimoun ki a tou moman i annan zot ledwa lo pou sa distrikt kot zot pe travay e monn vreman touse par sa solidarite ki zot montre letan i annan en maler. Zot sorti dan zot distrikt pou koste dan sa distrikt kot maler in frape. Mon war sa letan i annan en dife dan en lakaz, oubyen linondasyon. Me lepep Seselwa ti vreman eksperyans sa latmosfer lekip avek bann dezas le 7 Desanm. Dan Nor e dan Cascade, zot tou zot ti koste ansanm pou anmenn sipor e soutyen pour tou kin ganny afekte e fer sir ki tou

dimoun ti annan en landrwa pou repoze pandan sa bann dezas, tandi ki dan maler nou ti war serten pe fer politik plywood e swazir lekel pou asiste. Gouvernman Lokal ti travay an-etrwat kolaborasyon avek tou lazans pou asire ki sa loperasyon zean i ganny akonpli. Pandan sa lannen, Minister Gouvernman Lokal pou ankor enn fwa travay pre avek tou zabitan ek zot bann MNA pou regard dan bezwen tou zabitan san pran konsiderasyon politik an-konsiderasyon. Se sa lafason ki sa ladministrasyon LDS i azir – san faver e san preferans politik. Kontinyen avek sa bon travay.

Mr. Speaker, koman en pei ki pti e ki bezwen asire ki nou travayer lokal i ganny en lanplwa pou nourri son fanmiy an menm tan ki nou konsider mende enporte, sa size GOP pou reste en size enportan. Parfwa i difisil pour sa biznes ki pe mazin zis ganny son travayer pou oublie ki koman en gouvernman i pa zis en kekyon donn GOP, me ki sa travayer Seselwa i bezwen osi ganny konsidere pour en lanplwa. Ozordi mon fyer ki atraver sa bann zefor kontinyel to mank lanplwa i reste anba 5% e ki plis ki 1498 dimoun ki pe rod lanplwa ti ganny plase dan en lanplwa. Atraver bann diferan program, i kontinyen annan bann lantrenman pou permet sa dimoun ki pe rod en lanplwa pli pare pour sa monn travay oubyen pour bann ki pe rod en sanzman karyer kapab anbank lo en nouvo direksyon. Mon pe kontinyen ankouraz nou bann zenn pou pli boner posibil rantré dan en lanplwa pour zot ganny sa stabilite pour zot prop devlopman ek lepanouisman. Sel fason pou ganny leksperyans se atraver en lanplwa permanan.

Avek bann defi ki sosyete pe kontinyen fer fas avek, rol servis sosyal i reste enn ki vreman enportan. Malerezman, sa bon travay ki sa bann travayer i akonpli i pas dan divan letan en maler i arive. Mon bezwen dir ki bokou lanfaz pe kontinyen ganny mete lo proteksyon zanfán e ranforsi rol lafanmiy lo anmenn stabilite ek proteksyon pour sa bann zanfán ki pe grandi. Plizyer nouvo program pe ganny regarde pou asire ki non selman bann travayer i ganny byen prepare, me ki tou bann respizan sa bann servis i swiv ansanm program travay pou delivre meyer rezilta. I pa en travay fasil e se pour sa rezon ki mon kontinyen rod sipor nou popilasyon pou ede idantifye kot i annan problem ki souvann fwa i kapab ede sov en lavi avan ki maler potansyel i kapab detri sa lavi en inosan. Alor tou lankourazman pour tou travayer servis sosyal.

Mr Speaker, en lazans ki resevwar pli gro bidze se Lazans Proteksyon Sosyal. Parey noun war, sa ladministrasyon in fer en revizyon lo lasistans ki dimoun i resevwar. Sa i vin apre

deseni ki en tel lekzersis pann ganny fer. Ozordi noun kapab elimin labi e asiste dimoun ki dan bezwen. Felisitasyon pour sa transformasyon ki zot in anmennen. Anplis ki sa bann laplikasyon pe ganny travay lo la pli vit posibil pour ki dimoun ki dan bezwen i kapab ganny sa lasistans nesese. Mon pou kontinyen lans en lapel pour ki i annan bon korperasyon ant kliyan ek lazans. Letan ou ganny demande pou anmenn serten dokiman senp, fer li akoz se sa ki pou fasilite demars ki ou pe fer. Mon osi lans en lapel avek bann travayer sa lazans pou gard politik andeor zot travay. Zot la pou servi nou sitwayen. Gard zot latansyon lo zot travay e non pa lo kwa ki sa dimoun in fer politikman. Sa konplent in vin devan mwan e mon demande ki sa i arete silvouple.

Mr Speaker, i annan serten travay serye ki Minister Lagrikiltir pe antreprann pou asire ki a tou moman ferme i annan tou materyo ki zot bezwen dan store lagrikiltir ki a permet pli gran prodiksyon. Sa bann prosedir pou fasilite lenportasyon in ganny pran swen avek e byento ferme i kapab war plis prodwi lo bann stor lagrikiltir. Size manze zannimo i reste en size sansib e la mon anvi fer en lapel avek bann ki prodwi lokalman e bann ki enporte pou pa war sa aktivite zis lo son kote komersyal, me pou osi pran an-konsiderasyon sa rol kle ki zot zwe dan lasirans sekirite alimanter pour nou pei. Mon konnen ki i annan serten zwe ki osi pase parfwa pou fer ferme ankoler e menm kritik gouvènmman. Annou travay ansanm pour sa pei.

Nou pe kontinyen rode ki mannyer pou met plis later lagrikiltir a disponibilite bann ferme. Ki i lo Mahe, Praslin ek La Digue, tou zefor pe kontinyen ganny fer. Avek louvertir sa semen Amitie, Praslin, mon espere ki sa bann ferme i ava ganny akse ek zot kare later e ki prodiksyon i ava komanse. Nou bezwen met lanfaz lo plis prodiksyon e plis fasilite afen ki tou nou ferme i ganny sa lankourazman e ki tou lespri malis dan sa domenn i ganny eliminè.

Mr Speaker, nou lazènes i reste nou lespwar pour kontiniasyon nou kiltir, nou lekzistans e nou lavenir. Parey sanson i dir, lazènes pe pran pozitivite koman zot fason fer e ki la ater i annan en kantite zenn ki pe fer byen. Me i malere ki tro souvan tou bann zenn i ganny mete dan menm pannyen avek bann ki'n al dan move direksyon. Mon ti asiste prezantasyon bann award pour bann zenn dan diferan kategori tel ki motivasyon, linovasyon, model pour lezot, e plizyer lezot kategori. I ti en sware vremen ankourazan kot bann zenn motive, enn apre lot, fiy koman garson ti mont devan pou ganny rekonpanse. Se sa en lazènes motive ki letan ou

met divan anba zot lezel, zot pou al pli lwen posib. E sa bann zenn i sorti partou lo Mahe, Praslin ek La Digue. Ki vedir zot en bann bon model ki kapab sanz direksyon nou pei.

Letan en zenn parey Liam Dunienville, ki ti ganny top award i koz lo son parkour ek son lakonplisman, nou ganny en nouvo souf e nouvo lespwar i briye lo nou zoli Sesel. Bann zenn ki anvi war sa ki meyer non selman dan zot lavi, me ki krwar dan lavenir zot pei. Ozordi ankò enn fwa mon pou dir ki SNYC, anba direksyon Mr Duncan ek bann lezot ankadrer pe fer en travay forminab. Kontinyen senm sa mesaz pozitivite dan nou pei atraver zot aksyon, zot performans, zot letid ek zot partisipasyon. Sesel i bezwen son lazènes e mon ladministrasyon pou kontinyen donn zot tou sipor pour zot akonpli zot reve. Mon pou akonpany zot a tou moman personelman e la mon anvi dir zot ki dan tou mon bann rankont avek zot, swa State House dan bann aktivite oubyen dan Lasanble Lazènes ou dan lezot aktivite, zot lenerzi i kontazyè e i donn mwan nouvo kouraz ek determinasyon pou diriz sa pei toultan ver sa ki byen e bon pour nou pep. Felisasyon tou bann ankadrer e tou ki pe rod sa ki meyer pour nou zenn. La mon salyè Tania ek son lakademi, bann zenn dan proteksyon lanvironnman, bann school bands, bann sportif ki fer nou fyer e byen sir bann zenn ki pe pran zot letid o-serye. Keep it up !

Mr Speaker, devlopman lespri lantreprenarya parmi nou zenn ek nou popilasyon an-zeneral i bezwen kontinyen. Malgre ki nou mank teren pou kapab partaze, nou pe kontinyen donn tou lankourazman posib atraver bann diferan fasilite ki nou met a-dispozisyon nou pep. Tou kare later ki disponib in ganny distribye e ladministrasyon pe kontinyen rod bann later ki pa pe devlope pou nobou repartaz sa avek bann ki enterese. Nou pe kontinyen fasilite bann negosasyon pour ki akse avek finansman pa en lobstak dan limenm, me en mwayen devlopman. Byento proze lo Regatta site i ava termininen e nou ava ganny bann nouvo fasilite pour lwazir Beau Vallon. Sa lespri linovasyon fodre kontinyen grandi dan nou pei. Mon envit tou Seselwa pou sezi loportinite kin ganny mete a zot dispozisyon e pou servi zot byen. Zwe en rol pozitiv dan devlopman zot pei.

Mr Speaker, Lasante en pep I o-sant lavi. Pandan bann lannen kin pase, noun war gran lamelyorasyon dan servis ki nou pep I resevwar. Konplent dra in fini vin en size leparse, nivo servis pe kontinyen ogmante e tou fasilite pe ganny mete a-dispozisyon tou dimoun. Dousman, dousman, me avek sertitid, nou pe kapab byen servi nou mendev pou donn nou pep sa servis apropiye, Byensir, parey tou keksoz dan lavi, sa ki byen e bon pa zanmen

ganny menm piblisite avek sa ki pabon. En senp portre negativ I ganny pibliye partou lo FB, me sa ki byen pa zanmen ganny sa kalite piblisite. Portre lili nef ek matla nef kin ranpli lopital pa ganny menm sirkilasyon ek komanter ki en matla ki pe ganny ranplase akòz in ganny laz. Nouvo labour room renove ki pou pare byento pa pou zanmen ganny piblisite ki en transfer labour room detrw mwan pase ti gannyen. Mon pe senpleman dir ki dan nou servis lasante I annan en kantite keksoz pozitiv ki pe arive. Pou premye fwa lalis dimoun ki bezwen fer loperasyon katara I anba kontrol par egzamp. Annou donn lankourazman nou bann travayer lasante, an-mezir ki nou demann bann ki pa pe donn en bon servis pou amelyor zot konportman e donn tou pasyan ek zot fanmiy en sourir malgre lafatig.

Zisteman Mr. Speaker, yer noun fini met premye pyer pour sant rezyonnal lasante ki pou sitye Ile Soley dan distrik Anse Aux Pins e pou kout R17m, antyerman finanse par Gouvernman. Sa fasilite modern pou deservi en gran parti nou popilasyon letan I ava ouver son laport. Klinik Baie Lazare, en proze ki noun koz lo la a plizyer repriz isi dan Lasanble I dan bann staz finisyon, e byento bann pasyan dyaliz lo La Digue pa pou bezwen al Praslin pour dyaliz. Masin in fini ganny enstale e le moman ki nou rezourd sitiasyon mendev, sa servis I ava komanse. Tou nou bann fasilite medikal pe delivre a zot maksimonm e mon profite pou donn tou lankourazman nou bann travayer lasante e dir zot mersi pour swen ki zot donn tou pasyan ek kliyan ki pas dan zot lanmen.

Mr Speaker, I annan tro bokou keksoz pozitiv pou koz lo la dan nou pei. Pozitivite I mark desten nou pep. Kot nou regarde nou war progre ek devlopman e tou fasilite in ganny mete pour ki nou pep I kapab grenp sa pli o peron e akonplir son rev. Se sa lespri avek ki sa ladministrasyon I travay e sa I nou motivasyon pou travay pour sa pep. Nou pou kontinyen fer li avek nou leker ek tou lenerzi ki nou annan. Sa ki war kler I trouve zot menm, me sa ki pa anvi war, malerezman pa pou zanmen war nanryen e pou reste dan zot fernwanr.

Letan mon pe terminen permet mwan pou ankouraz tou nou bann zenn profesyonnel ki pe fer en gran kontribisyon dan nou pei. I annan bokou Seselwa solid ki annan sa langazman ek determinasyon pou fer nou pei bouze. Nou demokrasi i vivan e vibran. Pa les nou pei retourn an-aryer. Koman en pep mazinnen ki sel direksyon se pour nou bouz devan touzour e mont pli o posibil.

Meris bokou pour mon lekip, VP Afif, PM Ferrari e tou minis. Mersi caucus LDS ki kontinyen fer en gran travay pou fer programm gouvènmman marse isi dan Lasanble e dan kominote. Mersi Mr. Speaker pour ou pasyans ek lasazes. En gro mersi pour tou dimoun ki diriz bann lenstitisyon endepandan dan nou pei. Kontinyen fer zot travay san lafreyer oubyen faver. Pli gro mersi i al pour lepep Seselwa pour zot lankourazman ek zot sipor kontinyel. Mon swet nou pep ek nou pei tou sikse e tou sa ki bon e byen.

Mon prezant mwan ankor enn fwa koman zot serviter. Mon met mwan a zot dispozisyon e mon pou donn zot tou mon kouraz tan ki mon kapab. Mersi touzour.

Ki Bondye Toupwisan i beni nou pep ek nou pei.

Dan mon travay, parey mon ti promet 31an pase, 'Mon pa pou zanmen les tonbe Sesel!